

20  
22

ISLA ONLINE  
Noticia Transparente di Gobierno

Diahuebs 13 October 2022

Email: IslaOnline@gobierno.aw Tel: 528-4952



Gabinete Wever-Croes



**OCTOBER**  
LUNA DI CONSCIENTISACION DI  
**CANCER NA PECHO**

ISLA  
ONLINE

Noticia di Gobierno





## **PROME MINISTER, UN BIAHA MAS TA RECORDA OPOSICION, CU TA E MES A PIDI PA HACI UN INVESTIGACION RIBA ARUBAHUIS**

### **Y e mes lo informa Parlamento ora e investigacion keda cla**

Diahuebs mainta, Prome Minister Evelyn Wever-Croes a reacciona riba un mail anonimo cu ta circula cu contrincantenan politico a publica tocante Arubahuis. Ta trata aki di un email di mei 2021, den cual ta menciona cosnan cu no ta bay bon den Arubahuis. Prome Minister a enfatisa cu el a ricibi e email aki y ta na altura di dje y ta e denuncianan den e mail aki a conduci cu Prome Minister mes a pidi pa haci un investigacion riba Arubahuis. Por lo tanto, email anonimo aki tambe ta parti di e investigacion den cuadro di Arubahuis. “Mi por bisa asta cu, esun cu a manda e email anonimo aki cu a resulta di ta parti di e investigacion, tambe ta parti di dje”.

Ya ta varios ocacion Prome Minister a bin ta splicando riba e tema di Arubahuis den conferencianan di prensa di Gobierno di Aruba indicando cu tin un investigacion den full Arubahuis tumando luga cu e mes a pidi pa wordo haci. “Mi a compromete mi mes pa asina cu e investigacion y su consehonan ta cla, pa presenta nan na Parlamento, y informa comunidad henter. E investigacion ta den proceso y investigacionnan manera esaki por tarda”, Prome Minister un biaha mas ta bisa.

“Mi ta haya lamentable si, cu djies pa purba dañá mi nomber y haci politica, ta purba dañá un investigacion asina importante. Pasobra esey ta loke e politiconan oponente ta haci ora denuncia, exige rapport, exige investigacion mientras investigacion ya ta andando. Ora cu posicion ta insisti pa publica un documento cu no ta cla ainda, y esey lo dañá e investigacion. Mi a splica esaki hopi biaha, e investigacion ta tarda, ta berdad, esey ta pasa tur investigacion si bo kier hasie bon. Y nos Gobierno kier pa e investigacion wordo haci bon. Ohala e por a keda cla ayera mes, pero esaki no ta e caso. Mes un pura cu oposicion tin pa e keda cla, ami tambe tin pasobra mi kier pone un punto final tras di e tema aki.



Manera semper mi a demostra, ta para tras di mi palabra. Integridad ta hopi importante pa mi y pa mi Gobierno hasta ora cu mester tuma desicionnan cu no ta mas popular, mi a demostra cu mi tin e determinacion pa tuma e desicionnan aki cu ta na bienestar di pais Aruba. Y pueblo di Aruba por sigui conta riba esaki. Transparencia y bon gobernacion. Asina cu nos por duna mas informacion den detaye den e caso di Arubahuis, inmediatamente nos lo hacie. Na e momento aki, mientras e investigacion ta andando, si nos forsa pa bisa mas di dje, nos por dañá e investigacion y nos no kier haci esey”, Prome Minister Evelyn Wever-Croes a enfatisa.

Mientras tanto, Prome Minister a bolbe duna di conoce, e tema aki ta hopi importante y tin e atencion debido di Gobierno di Aruba. Mientras cu e investigacion ta andando, ta trahando riba e vision nobo pa Arubahuis cu ta e representacion di Aruba pa Hulanda pa garantisa cu nos Arubianonan na Hulanda sinti cu nan interesnan ta wordo miho atendi.



# **Prome Minister Evelyn Wever-Croes: Parlamentarionan cu ta wordo investiga of tin coleganan cu ta wordo investiga, MESTER COMPRENDE CU INVESTIGACIONNAN MANERA DI ARUBAHUIS TA TARDA Prome Minister mes a pidi pa un investigacion y lo informa Parlamento ora investigacion keda cla**



Durante e conferencia di Gobierno di Aruba diahuebs mainta, na unda cu Prome Minister Evelyn Wever-Croes a reacciona riba un mail anonimo cu ta circula cu contrincantenan politico a publica tocante Arubahuis, Prome Minister un biaha mas ta recorda politiconan cu cada biaha ta trece esaki dilanti a sabiendas cu e investigacion ta siguiendo su curso, cu ta e mes a pidi pa haci un investigacion riba Arubahuis y niun dia a sconde nada.

“Mi kier recorda oposicion y tur politico cu cada biaha kier bin cu e topico aki dilanti, cu ta AMI a pidi un investigacion den Arubahuis y cu semper ma bisa cu esun cu haci algo robes, e mester carga su responsabilidad, sinta riba su blaar sin importa kende e persona ta”, Prome Minister a enfatisa.

Prome Minister a haya basta insistencia di oposicion especialmente di Parlamentario Marisol Lopez-Tromp pa haya e rapport di e investigacion, y recientemente atrobe a manda un carta na Prome Minister. Prome Minister atrobe a contesta Parlamentario Lopez-Tromp manera el a haci den varios ocasion indicando cu manera e investigacion keda cla, Lopez-Tromp lo wordo informa.

“Mi ta kere cu Marisol Lopez-Tromp mas cu tur hende mester por comprende cu investigacionnan ta tarda siendo e mes

tambe sospechoso di e caso Kukwisa cu ta tardando hopi mas cu un aña”, Prome Minister a remarca.

E caso Kukwisa a causa hopi daño na Aruba. Pasobra ta e ministernan di infraestructura anterior a bay haci wega politico cu Departamento manera DIP, awe ta perhudicando miles di ciudadano cu no por haya tereno pa traha nan cas, no por haya tereno di huurgrond pa planta pa motibo di casonan di Kukwisa. Pero no por forsa e investigacion riba Parlamentario Lopez-Tromp. Mester laga e investigacion tuma su curso. Mescos tambe ta e caso di investigacion di ArubaHuis.

Parlamentario Gerlin Croes tambe ta pidi e rapport di investigacion siendo e tambe sa cu e investigacion ta andando. Y como hurista, e tambe mester por comprende cu casonan di investigacion ta tarda. Manera ta e caso tambe di Parlamentario Benny Sevinger cu ta colega di Parlamentario Gerlin Croes, e caso Avestruz. “Sinembargo Parlamentario Gerlin Croes a defende y brasa su colega mientras e tawata sa cu su colega ta wordo investiga pa corrupcion. E caso aki ta andando ya pa 3 aña. Kiermeen cu Parlamentario Gerlin Croes sa cu casonan asina ta tarda y no por wordo forsa, no por insisti pa nan pura pa caba, pasobra nos kier pa nan bay bon”.

Prome Minister ta haci un apelacion riba e politiconan oponentanan aki, tin hopi cos cu nan por haci nan trabou como oposicion riba dje. Pero no insisti pa un investigacion manera esun di Arubahuis wordo dañá cu nan insistencia. E investigacion, Prome Minister ta enfatisa, ta bayendo bon y mester lage cana su curso.

“Aruba ta pasando den hopi reto. Retonan cu nos a premira y retonan cu nos no a premira. Nos no por influencia e retonan manera e guerra di Ucrania cu a causa un crisis inflatorio enormemente grandi. Na e momento aki, Aruba tin mester di su miho politiconan. Aruba mester di nos tur pa hiba nos pais padilanti. Tin hopi cos pa nos enfoca riba dje. Ban uni forsa pa asina hunto nos enfoca riba e cosnan importante pa nos pais”, Prome Minister a expresa.



**Prome Minister Evelyn Wever - Croes:**

# **MESTER TENE CUENTA CU E PRESION CU LO BIN RIBA FONDO DI AZV NA MOMENTO CU HABRI FRONTERA CU VENEZUELA**




Durante di tratamento apertura di frontera cu Venezuela den Parlamento, Prome Minister Evelyn Wever - Croes a trece preocupacion di DVG dilanti. E preocupacion ta encera e presion financiero cu ta bin riba AZV, cual ta importante pa Parlamento tene cuenta cu ne.


Un aspecto cu a wordo pidi di parti DVG na gobierno pa tene cuenta cu ne den e decision pa habri frontera of no, ta encera e impacto cu esaki lo por tin riba fondo di salubridad.

DVG a indica cu na e momentonan aki tin situacion cu dokternan ta duna consulta na personanan cu no ta documenta y cu no tin AZV, y cu nan ta keda cu cuentanan di 200 pa 300 mil florin pa luna cu no ta wordo paga. Na fin di dia gobierno tincu paga esey, pues ta papiando di hopi placa, Prome Minister a expresa.


Banda di esaki, Prome Minister Wever - Croes a informa na Parlamento cu tin presion cu ta bin di organisacionnan internacional, pa Aruba duna e refugiadonan e status bou di AZV, pa cual Prome Minister a indica cu esaki no ta e momento

pa haci esaki. "Parlamento mes ta testigo di con ta luchando cu AZV y con mester a tuma cierto decisionnan no popular pa purba rescata e fondo." Si haci esaki, no por garantisar cu e fondo tey ni pa e grupo di persona aki y ni pa otro hende, Prome Minister a termina bisando.





Masha Pabien cu e di 10 aniversario di Stichting BOB. Un danki special ta bai na tur persona cu di un of otro manera a forma parti y a colabora pa asina Aruba por tin awe un programa di screening di pecho preventivo. Deteccion na tempo ta importante, pesey ta desea boso hopi aña mas haciendo un bunita trabou pa sigui conscientisa Aruba su pueblo.





**Prome Minister Evelyn Wever-Croes:**

## **SR. ADY THIJSSEN TA HURAMENTA COMO MINISTER PLENIPOTENCIARIO NA HULANDA**

**“Mi tin tur confiansa cu señor Thijsen cu su experiencia y  
conocemento, principalmente e amor pa Aruba, lo haci un bunita  
trabou pa nos na Hulanda”**



Durante conferencia di prensa di Gobierno di Aruba, Prome Minister Evelyn Wever-Croes a anuncia cu señor Ady Thijsen a huramenta dilanti gobernador como Minister Plenipotenciario na Hulanda diabiénes mainta.

Prome Minister a expresa di tin pleno confiansa cu señor Thijsen lo ta di gran aporte pa representa Aruba na Hulanda specialmente na e reunionann di Minister di Consejo di Reino mirando cu e tin hopi experiencia como político y gran conocemento den tereno di husticia y principalmente di Aruba su constitucion.

Señor Thijsen tambe lo ta encarga hunto cu e directora interino di Arubahuis pa trece cambionan fundamental na Arubahuis na Hulanda. Señor Thijsen lo eherce dos funcion, cu ta e

funcion di Minister Plenipotenciario na Den Haag y e funcion di representa Aruba na Union Europeo. Prome Minister tambe a enfatisa riba e hecho cu señor Thijsen lo ricibi solamente un salario pa eherce e dos funcionnan aki, mirando cu tin rumores caba ta circulando cu e lo ricibi dos salario. Esaki sigur no ta e caso ya cu señor Thijsen lo haya e salario di Gevolmachtigde Minister y cu esaki e lo eherce dos trabou. Esaki sigur ta parti di Gabinete Wever-Croes su esfuerzo pa contribui na baha gastonan structural den gobernacion.

Prome Minister ta desea señor Ady Thijsen, den nomber di pueblo di Aruba, tur clase di exito cu e reto nobo aki. “Mi tin tur confiansa cu señor Thijsen tin e experiencia y conocemento, principalmente e amor pa Aruba, y cu e lo haci un bunita trabou pa nos aya na Hulanda,” Prome Minister a expresa.





**Oportunidad unico pa esnan den e veld:**

## **MINISTER ARENDS TA ANUNCIA CONGRESO CONSULTATIVO CORPORATE GOVERNANCE**



Minister di Integridad, Ursell Arends, a haci un yamada na entidadnan publico y semi-publico pa acudi na un congreso consultativo cual lo tuma lugar dia 3 y 4 di november na Universidad di Aruba. Riba ambos dia lo enfoca riba e legislacion nobo riba e tereno di corporate governance.

“Good corporate governance ta un elemento esencial den e funcionamiento di sector publico y semi-publico”, asina minister Arends a comenta durante un conferencia di prensa. Durante e congreso lo elabora detayadamente riba e concept-Landsverordening, cual lo ser presenta pa consehero huridico, mr Carlos Guiamo.

Gabinete Wever-Croes II tin e ambicion pa fortalece practicanan di Good Corporate Governance den e entidadnan publico y semi-publico mas pronto posibel, y abase di miho standard nan internacional (“best practices”). Minister Arends hunto cu e voorzitter di e Commissie Corporate Governance, Sr. Jossy Laclé, a haci un yamada special na tur entidadnan pa nan participacion activo.

Good Corporate Governance ta rekeri esfuerso humano. Feedback di esnan cu ta labora den e veld di entidad publico y semi-publico ta sumamente importante pa gobierno. “Participacion activo ta e forma cu Ministerio di Transporte, Integridad, Naturalesa y Asuntonan di Adulto Mayor ta traha legislacion y maneho conhunto cu esnan involvi”, Minister Arends. Na banda di esnan laborando den e veld, tambe lo brinda oportunidad na studiantenan di Universidad participa na

e congreso consultativo.

Den e proceso di implementacion mester tene cuenta cu e circunstancianan special cu tin na Aruba manera e limitacion na recursonan y capacidad di cada entidad como tambe e sociedad cu ta uno chikito. E obhetivo ta pa hunto haci pasonan pa realisa “excellent corporate governance”. Abase di e vision aki na mei 2020 a instala e “Commissie Corporate Governance”.

E tarea di e comision aki ta pa duna conseho y aporta sosten na Gobierno pa implementa legislacion cual lo sirbi como e fundeshi pa Corporate Governance. A uza e structura cu ya a ser desaroya door di Banco Central como e base. Ordenansa Nacional y e codigo di Corporate Governance ta e productonan mas recien di e comision. Stakeholders tin awor tin e oportunidad di cera conoci cu e legislacion y tambe pa duna feedback riba esaki nan.

Si bo kier forma parti di e congreso consultativo, bo por manda un email cu bo nomber, funcion, telefoon y email adres na [I.lohuis@themis-institute.org](mailto:I.lohuis@themis-institute.org)

Tene cuenta cu cupo ta limita y ta completamente gratis pero cu si surpasa esaki lo evalua pa haci e congreso un biaha mas. Pa mas informacion por tuma contacto cu e secretaria di e comision “Corporate Governance” Drs. mr. Hellen van der Wal via [wabcadvies@gmail.com](mailto:wabcadvies@gmail.com)

### **Congreso Consultativo Corporate Governance**

**Pa Participa:**

Email nomber, funcion, telefoon y email adres na  
[I.lohuis@themis-institute.org](mailto:I.lohuis@themis-institute.org)

Pa mas informacion email secretaria  
di e comision “Corporate Governance”  
Dr. Mr. Hellen van der Wal  
[wabcadvies@gmail.com](mailto:wabcadvies@gmail.com)





# PLAN DI IMPUESTO 2023

UN SISTEMA SIMPEL Y HUSTO



Gobierno di Aruba

Minister di Finansa Xiomara Maduro ta presenta:

## PROGRAMA INFORMATIVO

“Plan di Impuesto 2023”

**13** | di october  
**2022**

SINTONISA:  
TELEARUBA - CANAL 23

**7:00 PM**



**Telearuba**

Plan di Impuesto 2023 ta vigente  
entrante 1 di januari 2023

*Hunto nos tur ta paga menos.*







## MINISTER MADURO TA LAMENTA CU AHATA TA LUBIDA PA KENDE GOBIERNO A HACI 'FUNDRAISING' NA HULANDA




Minister Maduro di Finansa a tuma nota di e articulo di AHATA den cual Gobierno ta wordo tilda di ta haci 'fundraising' cu e Plan di Impuesto 2023. E mandatario ta lamenta cu AHATA ta scohe pa uza e termino eyan pa referi na un plan pa yega na un sistema fiscal husto y simpel pa Aruba. Mas aun ta di lamenta cu AHATA ta lubida ta pa kende Gobierno durante pandemia a haci 'fundraising' na Hulanda creando un debe grandi cu awe ta pisa riba cartera di full un Pais.

Ta bon pa AHATA corda cu Gobierno a traha mas di 900 miyon florin na debe cu Hulanda di cual mas di 700 miyon florin a bay pa yuda comercio paga su trahadornan. Un gran parti di e placa aki a bay pa paga salarionan den e sector di turismo na companianan cu tambe ta forma parti di AHATA. E placa aki cu, entre otro, AHATA mes tabata pidi pa firma p'e pa caba, mester wordo paga bek. Hulanda no ta regala placa. Gobierno mester genera e placa pa paga bek tur e 'fundraising' cu a wordo haci cerca nan. Ta esaki ta e realidad financiero di Aruba y cu cada un di nos mester trata cun'e.


Como Minister di Finansa, e ta nos responsabilidad pa busca solucion pa full un Pais. Pa e motibo aki nos no por limita nos mes na haci locual un hende, un instancia of un grupo ta propone. Gobierno ta busca solucion pa full un Pais y no solamente pa un grupo of sector di nos Pais. Gobierno a haci 'fundraising' pa yuda AHATA su miembronan tambe y pa e motibo aki Minister di Finansa ta spera cu AHATA tambe por contribui na un manera positivo pa yega na solucion na bienestar di full Aruba.

### PRESUPUESTO 2023 IMPACTO COVID RIBA FINANSA PUBLICO

PERDIDA DI ENTRADA:  
-834 Miyon Florin den 3 aña



715 Miyon Florin  
na sosten financiero




PRESUPUESTO



Gobierno di Aruba

### PRESUPUESTO 2023 IMPACTO COVID RIBA FINANSA PUBLICO



PRESUPUESTO



Gobierno di Aruba



# MINISTER DI CULTURA Y CCDN TA INVITA TUR GRUPO DI SINT Y PIET PA INSCRIBI PA YEGADA DI SINTERKLAAS 2022



Minister di Cultura Xiomara Maduro conhuntamente cu Comision Celebracion Dianan Nacional ta haci un invitacion na tur grupo di Sint y Piet pa inscribi y participa na yegada di Sinterklaas 2022. E aña aki e gran yegada di Sinterklaas lo ta den su forma tradicional bek cu musica, baile y hopi emocion pa grandi y chikito. E aña aki tin varios cambian bunita pa mantene e fiesta di mas grandi di nos muchanan bibo pa e siguiente generacion. Tur grupo di Sint y Piet por inscribi via whatsapp na 593-6187 pa haya tur informacion. Ultimo dia pa inscribi ta Diamars, 18 di october 2022.







## **MINISTER GEOFFREY WEVER TA ENTREGA CERTIFICADO NA E MUCHANAN Y HOBENNAN CU A PARTICIPA NA "KID\$ BIZ MARKET III"**

Minister di Asuntonan Economico, Comunicacion y Desaroyo Sostenibel, mr. Geoffrey Wever, ta contento cu e proyecto educativo pa muchanan entre 9 te cu 13 aña, yama "Kid\$ BIZ Market III" cu IDEA di Departamento di Asuntonan Economico, Comercio y Industria, conhuntamente cu ActionCOACH, Santa Rosa, RBC Royal Bank, Aruba Bank N.V. a organisa den oktobervakantie. E meta di IDEA ta pa stimula y contribui na e formacion di futuro comerciantenan pa Aruba. Durante e siman di workshop e muchanan a haya informacion di ki tur un negoshi ta encera, con pa maneha un negoshi y nan a wordo stimula y inspira cu nan tambe por bira un futuro comerciante. Minister di Asuntonan Economico, Comunicacion y Desaroyo Sostenibel, mr. Geoffrey Wever, ta di opinion cu e spirito di entrepreneurship mester wordo fomenta di trempan den nos muchanan y hobennan.

### **E muchanan a participa den e siguiente workshop:**

- Get kids started as entrepreneurs
- Bringing the SDGs to the kids: The World we want
- Making Agriculture 'Cool' for Kids: Kids Agripreneur in the making
- Creative Card Making
- Financial Literacy: Earn, Spend wisely and Save
- Creative Snacks Making
- Business Plan for Kids

Na final di e siman di workshop, Minister Geoffrey Wever a haci entrega di e certificado di participacion na e 28 muchanan cu a participa. Minister Wever ta contento cu e interes pa e workshop cerca mayornan y ta gradici tur cu a aporta na e workshop. "Mi ta contento di wak hopi animo y interes den nos muchanan pa desaroya habilidadnan di comerciante for di edad jong caba. Mi ta gradici DEZHI pa organisa e workshop y mi ta desea tur e muchanan hopi exito den sigui desaroya nan espiritu empresarial", Minister Wever a comenta.







## A REUNI CU SR JOHN HUIZING DIRECTOR DI ROVC 'REGIONAL OPLEIDINGS EN VORMING CENTRUM' DI EDE HULANDA



Recientemente Minister Endy Croes a reuni cu director di ROVC sr John Huizing, cu ta den un comercieel opleidingsinstituut pa cu technische 'opleidingen' y tambe cursonan pa esnan cu ta buska trabou of ta trahando y ta desea un diploma of certificado. Minister Endy Croes a bishita sr Huizing durante e 'vierlanden overleg' na maart ultimo y a cera e contacto y recientemente sr Carlos Martinez, cu ta encarga awo cu OAA 'Avondleergangen Aruba' a viaha pa Hulanda na juni ultimo pa haci mas connexion y conocimiento di e opleidingen aki.

Actualmente sr Huizing ta na Aruba pa un siman pa yuda sr Martinez, pa cu preparacionnan y e cursonan nobo pa OAA. Pa di e forma aki OAA por inicia cu dos curso nobo cu ta koelmonteur y electromonteur, nan ta specialisa den hopi otro opleidingen, pero pa awo ta brindando tur nan sosten di e dos opleidingen menciona na sr Martinez di OAA y henter su team. Pa reuni cu docentenan, train e docentenan, intercambia

cu e docentenan y preparanan pa por inicia pronto cu e dos opleidingen y mas den februari di 2023 lo amplia tambe cu mas opleidingen.

E 'leerwerktraject' tambe ta preparando pa asina por tin tur cos coordina, pa por tin cursonan di corto duracion y opleidingen nan di mas largo duracion pa nos alumnonan di 17 aña bai ariba den cualquier edad. Tambe pa otro hendenan cu ta trahando caba na un compania di airco of compania di electricidad tambe por registra pa sigi un cierto cantidad di curso, y nan tambe por ricibi den futuro, mester regla esaki den ley y beleid pa nan por ricibi nan carnet cu ta identifica cu nan ta certifica ora nan bai traha na cualquier compania of cas di hende. Sr Martinez ta y OAA ta sumamente satisfecho con tur cos ta bayendo y ta gradici e sosten ricibi di sr Huizing di ROVC den e dos opleidingen aki di koelmonteur y electromonteur.



**Minister Endy Croes:**

# **LA SALLE COLLEGE EXAMENKLAS A HACI UN BISHITA NA MINISTER DI ENSEÑANSA Y DEPORTE Y PREMIER WEVER-CROES ASERCA DI CON PAIS ARUBA TA WORDO GOBERNA**

**En conexion cu nan les di geschiedenis pa cu nan examen final MAVO**



Minister di Enseñansa y Deporte Endy Croes hunto cu nos Premier Wever-Croes, a ricibi bishita di alumnonan di examenklas di La Salle College. Un total di 36 alumno y 3 docente a realisa e bishita aki. Prome alumnonan y docentenan a bishita Parlamento di Aruba na unda cu nan a ricibi informacionnan con Parlamento di Aruba ta funciona, cu ta esnan cu tin tarea pa controla Gobierno y despues e alumnonan a pasa pa Bestuurskantoor na unda cu Premier Wever-Croes y Minister Endy Croes a ricibinan y duna un amplio informacion y splicacion con Aruba ta wordo goberna y aserca di cada funcion. Prome Minister a cuminsa ta elabora un poco riba e trabou di un Minister, responsabilidadnan, Consejo di Minister y e organo mas halto cu ta tuma decision den gobierno. Despues Minister Endy Croes tambe a splica aserca di tur su trabounan como Minister di Enseñansa y Deporte y cu apesar di tur retonan den enseñansa cu ta existi, ta trahando pa logra soluciona cada un di e retonan akin a bienestar di nos studiantenan y maestronan.

E grupo di estudiante a lansa varios preguntanan hopi interesante specialmente riba e temanan di enseñansa y deporte. Minister Endy Croes a contesta cada pregunta brindando hopi informacionnan na e alumnonan di La Salle College examen klas. Minister Endy Croes a splica e hobennan cu gobierno ta trahando riba mas oportunidad, pa mas estudionan por wordo realisa na Aruba, pero cu Aruba ta keda un Pais chikito. Recientemente durante 'werk conferentie studie success caribische studenten' trahando cu Corsou y Boneiro, Sint Maarten, St Eutatus y Saba pa mira si hunto por ofrece mas oportunidad na nos hobennan.



Minister Endy Croes y Premier Wever-Croes a gradici La Salle College pa nan bishita na bestuurskantoor y deseanan tur clase di exito cu nan examen final. Y ta sumamente importante pa nos hobennan ta na altura con pais Aruba ta wordo goberna. Minister Endy Croes ta garantisa cu nos tin hobennan potencial cu ta intresa pa drenta despues di nan studio arena politica.





## **MINISTER GLENBERT CROES A PIDI WEB Y ELMAR PA ACTIVA NAN HELPDESK PA HENDENAN CU CUENTANAN EXTREMADAMENTE HALTO**

Minister Glenbert Croes ta hayando reaccion di consumidornan cu a conoce un aumento di 100% den nan cuenta mensual di awa y coriente.

Nos tur sa cu e aumento anuncia no tabata di 100% pero mas bien un averahe di 24%.

Clientenan cu a haya un cuenta notablemente hopi mas halto cu e aumento temporario introduci, mester acudi inmediatamente na WEB y/of ELMAR unda nan cuenta lo ser atendi cu e atencion y comprension debido.

Utilities cu ta e compania di Gobierno cu ta doño di WEB Y ELMAR ya a transmiti e peticion aki di Gobierno na nos companianan estatal.

Nos tur ta altanto y nos pueblo conciente cu prijs di petroleo ta halto y ta aumentando pa dos factor: 1. E guerra entre Rusia y Ucrania 2. Pa e paro di produccion di petroleo cu Paisnan OPEC (cu ta produci petroleo) a introduci cu e meta pa e prijs di crudo sigui aumenta cu 3. pronto lo por causa un recesion mundial.

Minister Glenbert Croes di su banda ta haciendo su maximo esfuerzo pa por haya HFO cumpra na un prijs mas barata pa finalmente transmiti e reduccion aki pa nos pueblo.

### **PA TUR PROBLEMA MESTER BUSCA SOLUCION**

Y apesar cu tin un campaña formal contra di e mandatario su empeño y esfuerzo, e ta sigui convenci y determina den su mision. Pa tur problema mester busca e solucion. No por keda



sinta man cruza sin haci nada.

### **LO CUMPLI CU E EXIGENCIANAN DI ARUBA**

Determina e mandatario ta biaha proximamente pa Ecuador den su mision di haya crudo na un prijs mas ventahoso cu ta cumpli cu e rekesito- y especificacionnan cu Aruba ta exige.

Manera e mandatario a expresa: "Nos NO ta tuma e situacion aki pa venci. Ora cu tin bon intencion lo insuperable ta bira superable pa finalmente nos trece alivio pa nos hendenan cu ta pasando den momentonan duro y dificil. Esey ta nos mision."



# GOBERNADOR ALFONSO BOEKHOUDT A HURAMENTE ADY THIJSSEN COMO MINISTER PLENIPOTENCIARIO NA HULANDA

Gobernador di Aruba, señor Alfonso Boekhoudt awe mainta na Cas Ceremonial di Gobernador a huramenta señor Ady Thijsen como Minister Plenipotenciario di Aruba na Hulanda.

Despues di e huramentacion minister Thijsen a duna un declaracion unda ela bisa di ta sumamente contento di mira cu den transcurso di su carera politico, awe el a haña un otro responsabilidad cu no ta den Parlamento di Aruba. Señor Thijsen su unico meta ta pa traha na bienestar di pais Aruba y cu hopi honor a tuma e responsabilidad aki cu sigur no lo ta uno facil.

Señor Thijsen ta gradici gobierno di Aruba pa dune e confiansa como Minister Plenipotenciario na Hulanda y alabes como representante di Aruba na Union Europeo. Tambe el a tuma e oportunidad pa gradici esnan cu semper a sa di sostene su persona durante su trayecto como politico, specialmente su hendenan di Savaneta cu semper a kere den su persona.





DESPUES DI TEMPESTAD,  
LAMA TA BIRA CALMO ATROBE.  
ESAKI TA OPORTUNIDAD PA NABEGA Y RECUPERA.  
CU BISTA RIBA E HORIZONTE INSIGUR,  
PERO CONSCIENTE CU NOS LO SURPASA ATROBE,  
TUR RETO NOS DILANTI COMO UN SOCIEDAD UNI.  
MANTENE CALMO Y UZA TUR MAL TEMPO  
COMO UN OPORTUNIDAD PA SIÑA Y INNOVA  
Y CONBIRTI E CRISIS CU NOS A PASA ADEN,  
DEN SPERANSA Y POSIBILIDAD NOBO PA NOS TUR.

*Feliz diahuebs!*



**20  
22** | AÑA DI  
INVERSION Y  
OPORTUNIDAD